

# Tutu é kuvi ūni e táxnūu San Juan

## Kaka'án Juuan iña Gáyu

<sup>1</sup>Xu'u é ñata odo nūu u ne, taxnūu u tú'ūn sa'á iña nto, Gayu, dívi ntō e dóo kakuinimá ko nto é nuu é ntaā i.

<sup>2</sup>Ntō'ó ení ko e dóo ntio kó, kakan ú nta'a Xuva kō vata koo é vā'á tsi koo nī kúñu ntō, vata sá ō va'á nuu nima nto. <sup>3</sup>Ñá tē nté kaa ka'nu kuiní ko dá xee tá'an kō ne, ntántaa ña nī ko é vā'á tsi ō tuví nto é kāde ntaa ntí'xe nto tú'ūn é nuu é ntaā i. <sup>4</sup>Ñá túvī nee iña e dóo ka'nu kuiní ko é vāta kaa é kūtuni ko tsi ntáde ntaa i'xá ko tú'ūn é nuu é ntaā í san.

<sup>5</sup>Ntō'ó ení ko e dóo ntio kó, dōó ini de ntáa nto é kaxntii nto ta'an kō, ña ntákuinti'xe i sán, nī ña vé'xi tūku ñuú san. <sup>6</sup>Dívi ña ntáka'an ñá nī ña kuinti'xe i san tsi dóo kakuinima ntó ña. Víí nto da xe'e ne, xntii ká nto ña nee iña é ntio ña é k'í'n ká ña itsi, vata tsi ó ntio Xuva kō. <sup>7</sup>Tsí dívi ña né, ntii ña ñuú mii ñá, kué'en ña kuenta iña Jesúristu. Ñá tē nee iña ni kī'i ña iña ña'a é ña ntákuinti'xe i san. <sup>8</sup>Dukuān né, xo'o kuēnta víí o ña nee iña é xntii o ñá, vata koo é kada tsiñu dadíi o ni ña kuēnta iña tú'ūn é nuu é ntaā í san.

## Ēdé xení Diotrefi, ntá tsi é vā'á ede Demetriu

<sup>9</sup>E táxnūu u tú'un iña ña ntákuinti'xe i san. Ntá tsi Diotrefí san ne, ñá ntio ña é xéé nti mí tuví ña, tsí dívi ñá e dóo ncho kodo nuū ña. <sup>10</sup>Te k'í'n u ne, ká'án ú ni ñá nté kui kade xení ña nī nti é káka'an kíni ña iñá nti. Ñá te da mii tsi sāl'á dí, tsí ña kaxé'e ña é kuntōo ta'an ko, ña kuínti'xe i san. Ña kaxé'e ña itsí é kué'e tūku ña'a é kuntōo ña dí. Tē xoo kué'e i ña é kuntōo ña ne, ña kaxé'e Diotrefi é k'í'ví ka ña má ūkún kán.

<sup>11</sup>Ntō'ó ení ko e dóo ntio ko, ña kú de nto vatā ó de ña kini ntáa, tsi víí nto e dóo va'a. Xoó ña'a é kāde ña é vā'á ne, kaduku ntée ña Xuva kō. Ntá tsi xoo ñá'a é kāde ña é kīni kaa ne, vata kiní ñá Xuva kō.

<sup>12</sup>Un ntíí ntíí ña'a ntáka'an ña tsí Demetriú ne, dōo va'á ña'a ña. Kutuni ko tsi dóo va'á ña é kāde ntaa ña é nuu é ntaā i. Kuān o ntáka'án nti kuenta iña ñá ne, ini nto tsí nuu é ntaā i ntáka'án nti.

## I'a ntí'i tú'ūn sa'a

<sup>13</sup>Dōó ío nuu i é ká'án u ni ntō, ntá tsi ñá ká'án u ni ntō é tutu

tsí sa. <sup>14</sup>Á te kīnī u nto vi'a ve ne,  
kidáa tiín dadii o ntuvi ō.

<sup>15</sup>Vá'a tsi koo kuntōo nto. Ña  
é vā'á tiin ni'i ō, ña ntoo i'a ne,

taxnūu ña ntiusi nto. Nakué'e nto  
ntiusi iña ña é vā'á tiin ni'i ō, é un  
é un ña ntoo dikan. Kuan tsi koo é  
kā'án u ni ntō.